

洞真太上說智慧消魔真經卷之一

真藥玄英高靈品

太上道君時說上清大智慧文消魔真藥玄英高靈品叙金闕帝君曾侍座而聞之乃以告青童君曰此上清消魔智慧經中之所言也將可以逐邪起疾驅精除害散六天之鬼悉制萬妖之侵者誦此章乎實神虎之支幹真炁以祕用上相脫可以告道士宿命先有真名者未學之時而為衆邪所乘在室之日而為鬼物所病者若能晝日誦之於房夜則誦之於心乃百邪遠爾使神開心朗矣青童君拜受所說以載於神符之篇焉玉清上清太極藥名猶足以却百鬼况服食其物乎九宮之仙莫見此書之篇目太極上真亦不傳智慧之大經也此經施於知空之學徒不授於地上之真名須道成昇太極乃傳諸有受者耳今太上說鈔智慧之經中萬分之一言耳雖有真名於地上而未去學道无緣盡聞之也是為此經不可備聞也聞其首題知其藥名也為有真命之名玉書上清也

青童君伏受所說後以告赤松子赤松子學道未得之時乃於金華山中忽得疾病困篤

經一十六年雖復思真存精而所苦不愈松子當此之時故自平心求道研神守靜初不以困病為悲感以生死為視聽也所謂六天

靈鬼以病亂真或上人教耶使疾但志欲壞真心視履水火正與不正也乃為病試者矣松子既清齋扶疾誦智慧消魔品三千遍則所疾都愈心開神朗有愈於未病之時也蓋夫病者一以試心誠二以下尸濁三以消不

正四以鍊塵穢若平心堅向情志愈造求道守神希期玄教者則疾可須臾而散矣若惑疾亂心守慙不固情遊雜向誠存苟免者則疾可終朝而考矣松子後於大霍山中道成上詣金闕受書為太虛真人是宿有真名於

上清也智慧經一名太素洞經或名素慧傳凡有七卷藏於玉清之闕高上虛皇丹房之裏矣常使素靈玉女三千人侍此七卷書也故或號曰太素洞經耳智者知日中之上皇也

慧者宜以生生為急也慧學有兩生共併而

共乘一急之象也

有畫誌者智慧經言也死畫誌者太上道君二相言耳當以次合盡誦之使三千過遍數未足而中息皆更從一始若長齋正室注心誦畢皆當斷絕外物不得中息中息爰接於

身玉童上刻三官奏聞於金闕也不可不慎學道者要當誦之使畢皆却邪朗神開心散愚除妖平悉真精入體者也先齋五十日乃當誦之撮手安祝令聲裁出口勿忽卒也勿速略也既究之後自得其妙其時靈人將有

降告能解其旨亦飛行太虛太虛真人是也誦得萬遍乃佳也功畢之日雲車亦至矣此道大於三十九篇洞經而得猶減之者是智慧之鈔萬分之一故耳况盡看七卷之玄圃乎然四極科法不得傳地上學道未昇天之

真人如可修齋之日盡誦此一卷乃佳窮人自不能爾也在世間俗中聞看神文自聽讀之不在故齋注心畢之數也亦宜先覽省今

諸識條例然後乃齋誦之三千過為一畢二千過為一至三千過為一八四三千過

為一朗鬱儀赤文為四朗應景散者也不可先已整看已諳既誦勿忽略而過此青童東科之大忌也使人眼失守光慎之常當安注視字徐徐而微言誦之若輟誤更却讀於止以還三十字清靜燒香漱口向東平旦為始如結璣黃童所謂溫之至道旦者也

當誦經時聽三時食息也辰時午時酉時夜去至平旦矣若一畢事宜又未得即齋更誦者遲速自期不必相涉也一畢欲更讀者皆當更齋如初洞臺內書刻鬱絕西山北絕石其文曰誘會有素娛端加講所精至道方朗豁智來溫慧經者也其文多聊首書誦書之意也

上清大智慧文消魔真樂玄英高靈品叙太上道君所受高上經也亦使人飛輪太空逐截六天之炁此經有七卷太上道君所寶秘也今青童君鈔撰消魔之章萬分之一刷雜於神符之前後也  
太上老君為太上大道君與領神虎太符金虎真符智慧素經告王君使傳知真者告青童

使傳成真者夫知真者謂智真而得真成真者謂愚求而獲真者也此書唯使二君傳授於玄名玉書者他真人不得妄傳之矣是以太上故告於後聖金闕帝君金闕帝君以付上相上宰二君七百年內聽三傳先誓盟畢

而行之不盟而視七世獲考於三陰水官

三陰者五帝之三官也治罪人之死生矣

第一左官治生人之罪第二右官治死人之罪第三女官治女人之罪又水火左右官

左水官治妄言天地宣泄天文層毀二象

惡犯三辰者右火官治大逆殺生伐害師

君反謀父母罪大丘山者也五府在岱宗

之下太山之陰空洞之小天小天周迴四

千里盡置於三官也玄中有三太空有五

清太空有上清太空有太極太空玄中有

三空洞亦然也夫太空者在太山之下空

洞之上也夫空洞者在太空之下真人官

室之上也夫太清九宮亦有三太虛太虛

者在太極空洞之下五岳之虛中也

太上說智慧

太上老君侍太上大道君之左道君閑居於憐晨靈觀陵增之室下籍九玄紫輝右衛有六領獅子巨獸於是太保真人簡生玉清神女房素執朱陵飛炁之香華捧要妙之幽章而立太上道君漱碧水吐絳炁虛心靜躬安

神注玄乃左帶神虎右佩金真說吟智慧上

經及靈藥消魔上章及八玄九真七扉三燭

曰虛曰无上文玄郁千真停輪萬靈止足靈

音上激誌畫介福殊響逸奏洞金朝玉上監

潛幽下煥筌伏玄範流秀神覽顯速道會无

涯希韻幽覺颺悉延虛埃圮積域是以玄珠

有悵快之照清鑿微閑寂之錄大道遠備飛

光遐灼動步靈溪驚浪素逸沈提九寔難望

解踵變不期蔚處不固墨變化翹陽希樞德

景恬愉雙門反悟理幾鎮朴大象振群廣河

冥洞玄通理妙接微遊玩神刀汎澄大塊激

百陽以生電敷千陰以吐威六天失炁九魔

消摧握日廣霞萬煙入懷靜與天地合契動

與七景齊睥窺安弗安慮危弗危映徹波煙

拘真放柶協晨則二絕交和眇目則萬冥自

開於是足排七度手秉天機顯蓋玄辰合運  
二儀河山爲之崩決四系爲之流移德聖明  
石迅耳豁頰周落雲度廓一玄歸則神全虛  
使妙韻玄飛者必能動太空於无旋生群風  
於潛穎舉八景以上昇抗飛轡於清領逸鳳  
車以高觀放雲耕以流騁歡九遐以濟豁凌  
紫天而停朱景樂七源以通蒸冠碧津而注  
絳井颺煙浪雷與妙體挺澄空神欽靈梯絕  
永矣朱光已煥岐入玄河或翼觀化逸尚虛  
羅萬殊總映飛輪玉阿鸞嘯龍躍虎嗥鳳歌  
萬響瓊散衆玉亂詭琅林振風絳木踊華爾  
乃激和萬音飛鳴千律靈範既舒雲障顯質  
弘化晨流奇術夕出解帶遊神擁膝蕭粹觀  
化不藻平玄不蔚挺關空流蕭任瑩蒼七朗  
永時不遺不貴道蕩寒雲无獨无對欽託神  
條行歌冥惠攬天備肝獅子鎮鼎焦火衛魂  
銅頭齊魄長牙奮耳以逆躍電父激悉以雙  
跌揭齒飲足雷公磴捺六胸管瞻五虎响沸  
銜力逐邪狂獸驅穢谷雷雷精保生莫墜然  
此靈禽始由人動道亦濟生凌峯凝神振拔

崢嶸九凶造難不思不情均合八象器玄炁  
輕重霄七時垂芳秀英朱黃炎萃非煙煥靈  
陶運合真灑朴散名激味靈輪神悉平清任  
波二天高芳馨冥玉女執香紫妃抱甕灌津  
霄池散華玉庭徽命甲騎族攝天丁毒龍吐  
陰神虎出兵外纏玄炁內備七城道未降合  
憑威而生真成齊德元炁玄并是故玉清霄  
真心无空岸高袖絕冥抱丹雲洞爰及上道  
之士含章自繫連于上德之士獨味冥散玄  
不期真標不塔煥頤頑大道濠川之畔冲起  
應時希微常韻飛弦遠逸音不待彈九和玄  
響空同至宴故能心絕於天外妙同於一觀  
也自此以下皆龍曜四澤發精幽倦遊夢玉  
清託景上閣浪映昇虛手排八千身振紫策  
中朱冠連晃照七谷蕊芳激煙精徹太虛德  
功九天併日戴月性恬浩篇飛輪北丘解帶  
華園西母命變參乘龜山四德大惠妙詠太  
玄六陰美騷來修昔緣自德致不遐心未悟  
真者皆加以琅玕鬱華七陽日嬰九琳之液  
八瓊之精四蕊紫璣五珠絳生三華飛剛雙

珠月明蘭酒金粘甘露玉瓶青蓮弱羅澤芝  
流靈神樂丹散玄柯運紫琅根朝結西皇素  
盈可以衝躍朱霄飛虛玉清呼而翁之以至  
真靈漱而變之以入紫庭亦可以東捲織女  
之水亦可以西盡長庚虞汗亦可以南窮陽  
光之根亦可以北溯太陰夜城於是未夏燄  
陽景颺遠翔太虛發精二象仰九八道調和  
乘穆運芳化理九絕德暢玉皇窈窕三關神  
軒四張慶雲霄樓六度休祥靈風散魔法鼓  
微兵遊泥濯津洗之滄浪練魂化魄俱會道  
場撥清把蕭和炁保長服落華顯惠讚外融  
下挹玄流仰排空同矣翻翻未學少玩道宗  
昔因德舉位爲仙皇飛落脫世上遊空同鱗  
遊冥津振地天江朝夕衆仙下幾存亡耳忽  
聞玉清之上道窈窕之玄岸志慕首仰坐以  
待旦我獨何喜耽此小宴何可長染風塵終  
爲上皇所扑擊者乎於是乃置弄仙童解冠  
囊世雖復體和紛林然心杳象外髮鬢高秀  
希音玉籟爾乃遂辭榮散華振策崇嶺嚼嚼  
元炁吸引二景抗翅滿征極神測擬寂胃虛

中欽燕傾鼎殊在守玄彌春閉靜淡身自喪  
尸不束整放形存空无執无乘矣遂啓洞門  
於希林尋靈迹於丹穴發九天之朱匱望上  
清之瓊札玄書既刻於玉章絳名始刊於虛  
闕周遊五嶽萬巖畢至百岫千峯莫不履比  
一瞻玉陛於紫清之雲再觀神文於錦雲之  
笈四遇三元於玄臺六造五老於靈室為太  
帝攜持有九扇高上同華者七於是天扉廓  
散素徹朗幽延輪迴軒高會上朝羽禡錦絳  
流鈴鳴簫龍冠鳳裙隨雲道遠冥漢齊晨心  
洞體遠乃覺我往醫足亂藏今起似鸞馳是  
時實自足自娛長寧紫字矣通玄測極向空  
尤難然後知道妙靈觀有累千之塗矣足生  
齊全玄心壁往然後知求心之定足生之幸  
矣是故宗之者衆極之者寡矣然正用无堅  
之心以上向玉真之感又須无難之往以上  
求至生之固亦必獲玉映以齊終感帝皇  
之延容也蕩則萬萬而不莫專則有莫而萬  
來矣諸有外情之徒欲栖生之夫聞道而膠  
行道寂則俱亡向山而兩足酸寒涉川而三

血波戰五體交攻於未墜之谷一身驚刺於  
死生之岸者適是盡天年之勞苦為聲名之  
外規耳要皆由心散不一情蕩不固漸競日  
滋渾不自覺壞正喪志迷夢遺林故矣夫可  
以告至道哉

今將告子靈真絕術天仙之方大度秘要長  
存上經也若欲白日昇天北詣玉皇策龍飛  
景宮館上清倒擲瓊輪顛迴五辰合日揚光  
入月徹明者當得三清隱書佩神金虎符靈  
儀赤文招日同舉結璘黃童與月共居洞真  
玄經五辰合遊大洞真經七世散仇三十九  
華七組仙天黃老八道九真神書上還靈書  
紫文魂魄鍊拘金關作紀五老寶籙玉庭百  
芝上清精華玉清智慧經中鈔言

乃曰六溥發榮玄光八角風實雲子帝坦玉  
闈全敷英英廣天黃木昌城玉華夜山火玉  
運乃鳳林鳴酢西瑤瓊酒中華紫雲北陵絳  
阜絳津金髓月精日壽朱河琅子蓬山文醜  
濯水七莖崩嶽電柳北株玄郭之綺意仰漱  
雲水之朱窈夜牛伏骨神吾黃漆空同靈瓜

四劫一實冥城麟膳炎山夜日東掖扶桑之  
丹椽俯探長洲之立藻上和九轉之飛玉下  
咽青玄霞之寶太虛結錄素女懷抱紫虬童  
子九色鳳腦太極隱芝絳樹日道太上虹李  
天漢大草南宮巨珠西鄉扶老三望龍華靈

妃所討有得食之後天而老此玉清之所服  
太上之所寶可以上飛景霄外農億道守鎮  
皇精朝注九腦也然斯道至大妙靈映邈非  
血食肉人所得備悉但聞玄音以散濁聽風  
氣而迷穢矣上可浮絕泰素下可以壞效詬  
疾自非德響根神孰能併流於靈逸哉故上  
消魔以理蒸於萬通故上真藥名以有神而  
弃邪信哉斯言

其次上清幽芝太上九時有八光太和斑龍  
黑胎文虎白沫出于西丘七玄飛節九孔瓊  
珠雲漿琳酒玄圃瓊腰鐘山白膠金生青敷  
蘭風石腦黑河珊瑚蒙山白鳳玉勝靈丘蒼  
竇金血東英朱葉九節交結太微紫麻瓊華  
玉實流淵鯨珠赤河絳壁北汲太極之井中  
撰文朱之脉雲庭神桃昆園平雀夜精日草

青津碧液具宮營壇玄都三蓋左服玉童之光右抱玉女之炁上招神元下飲玄瀨仰握蘭圃之瓊精俯撻圓丘之紫捺白水靈蛤八天赤遊萬載一生流光九隊有得食之後天而遊此天帝之所服太上之寶貴非太極之所關中真之所逮誦其章可以奇流永生諷其名可以起疾斬精

蓋夫智慧之章消魔之經極鈔於妙象也靈芝上藥真皇清辭亦粗激於道目中矣佩符帶真口誦九素庶足測衆魔之情乎體元承悉朝研玉玄當守之以萬椿之外耳四魂九魄乃遂交生於一身之用之殆足樂也其次太極之品四真常珍乃曰九石鍊煙丹液玉滋荀首流珠琳華石精丹鍊金液紫華虹英太清九轉五雲之漿玄霜降靈騰躍三黃東嬴白香滄浪青鏡高丘餘糧積石飛田太虛還丹太秦玄堅長光流草雲童飛千亦能使上飛輕舉起體霄冥矣此天仙之所服飛神之所研非陸遊之所聞山客之所見也又當知九化十變隱地八術然後乃能廣遊

玄空倒步天阿乘雲駕龍凌騰无方矣其次又有三十六芝飛爐煉煙陽水月華五石之腴填生五藏煉魄易軀及魂施雲屑金粉玉柔亦能延年益壽可至萬歲也其次又有玄水雲華之漿五黃營帶精千

石瓊飲衆青朱英白車飛節之寶流馬紫木之黃一服立使人長算千紀日服日延年隨藥進命與藥遷亦无窮之靈物不死之奇方也夫長算千紀時謂服但一刀圭而已耳畢其下藥先有松栢陰脂山薑伏神昌蒲門冬巨勝黃精菊花苟杞崖蜜茯苓桃皮澤瀉威蕤黃連芥麻地黃赤板朱英雲飛水桂衆物之精其類繁多略舉一端服之為能小益不能水中高可七百年下可三四百歲恐不辨長享无期上昇青天也亦能身生光澤還白童顏役使千神得為地仙陸行五嶽遊浪名山故不自辟其必死也又漸求上藥以自改新則易為階級之進何必守故而遷取期限以沒齒乎然此等道宜柔弱温仁至心一意潔體清淨調和五藏安形念景存保百神

守魂煉魄除蕩滓遊心重玄情无流華之慾抱一獨往懷无嬰塵之累薰辛五辣不近於口肥滋血味不經於腸山居空處不營外事乃上可以就玄存真召神符靈不可以餌食八石呼吸液津也夫陰丹內御房中之術黃道赤炁交接之益七九朝精吐納之要六一迴丹雌雄之法雖獲仙名而上清不以此德雖均致化而太上不以為貴此穢仙濁真固不得闕乎玉闥矣且嶮嶮履米多見倒車之敗縱有全者臭亂之地仙耳想訪擬高靴不足絳意而注營乎近不及導引服炁之法胎息閉心存念之術幽神中篇金匱隱旨黃庭內外太清守記凡如此道數千餘事皆流傳俗間兆所知聞自中世以來軒輊之後以此諸道而登度者人以嶮積不可勝數此懃心至矣守精篤矣東操堅矣志向定矣行此四德余將為兆破魔昇仙也至於不固之人有為之者或彌年歷紀不得其益何也或服引呼吸不得其理或為他物所惑將成而敗或暫得其益遇疾則止或師將告之而不知別

或心不能專精神紛錯或積罪作咎以犯天忌或虛增經方以意損益凡如此者往往相尋此皆浮華之人傲穢之士為有虛言不可敬也故使大道不匝於天下真仙希遊於世間皆人之深責非吾黨之咎累矣夫訣在平淡无營內視八道數神垂魂不苟不保灰塵九魂抱一遊冥五藏莫放液炁玄凝臨死生而不畏對奇惟而不傾縱天形於空同歛神和而守精於是大試於何而起妖罔從何而生金石不能比其大質八流不能敵其淵停澄正之才實由天生亦可學而速獲亦可不求而成矣格而言之仙非強可求真非干可營自无玄籍自不得聞智慧之經自无玉書終不見吾神金虎章自非懇慕飛仙不得知太極上清摠而言之分也志也精也懃也行陰德也救災厄也慧窮困也立仁功也都而統之慈心以對萬物勿行凶心以向萬生道要之門戶矣獲道之曲室也子懃誦而思上靈將告子難通之辭或心開而解宗朗神而真來萬鬼走進篤病不治妖注竄伏疾愈即

時實賴神虎以威六天亦由智慧御消魔之醫也百經解脫心炳神康六和長安七精關朗衆羅連縱不存不亡大哉上真太上元功諷及於此上拜四方大以尊我神文黃道大章矣若誦經未滿三千遍而中止者又當更齋誦之三千遍不得詎前為數也

洞真太上說智慧消魔真經卷之一

正一天師清微弟子百堅製作  
道教學術資訊網

洞真太上說智慧消魔真經卷之二 內二

入定品

太上八術智慧滅魔神虎隱文得者入定生  
生无死上相青童撰合成章

若有篤志宿命應見此文受之皆當齋戒費金龍玉魚盟誓皆是天下萬精群靈之名千魔萬妖之隱諱也故撰之成文太一帝君常以鬼兵衛之慎勿輕傳太上大道君爰乃自彈景龍雲璈宵音千逸萬響纏激流徽鬱勃紫鶴迴蔭玄風八發放是玉鳳延頸金鸞整悉龍吟碧波虎躍神州九嘯和唱玄鈞洞无伏獸攘袂猛馬張喉揭嶽橫林街劍攝邪衆聲紛亂百狼攫妖爾乃命玉清上官侍女安法嬰田四非趙定珠存雲門等合歌揮神之詩滅精散靈之曲其辭曰汎汎太霞戀八浮造雲營神宗理靈襟龍翰秀玉京金門纏蔚裕九房朗紫瓊高駕涉北元蕭蕭入无生朱虎導靈師綠轅登上清四玄明朝禁抱華還鳳城七難尚梵綠擬標九元衢宣曜寶太陽颯矚景敷整控塔素鄉河靈已前驅陰雲